

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIV No. 18
Oktubre 21, 2003
www.philippinerevolution.org

Editoryal

Hepe nga imperyalista kag terorista, ginsikway sang pumuluyong Pilipino

Ang madamol kag mai-tom nga panganod nga dala sang paghugpa sa Pilipinas ni Pres. George W. Bush sang US sadtong Oktubre 18 gin-hawan sang pagwagayway sang linibu-libo nga bandera nga nagapahayag sang nagaindakal nga protesta sang pumuluyong Pilipino batuk sa imperyalismong US kag papet nga rehimeng Arroyo.



Ang pagsilab sa ginatus-gatos nga bandera sang US-simbolo sang imperyalista nga pagpamigos kag pagpanghimulos sa Pilipinas kag sa bug-os nga kalibutan-nagtuga sang kasanag samtang ang higante nga anino sang imperyalistang agila nagapangibabaw sa bug-os nga pungsod.

Nagdaguob ang mga singgit sang pila ka pulo ka libo nga nagmartsa sa karsada kag sang minilyun-milyon pa nga nagapamatuk sa nagkalain-lain nga paagi kag lugar: Tapuson ang imperyalista nga pagginahum sa Pilipinas! Tapuson ang papet nga rehimeng Arroyo! Sa pihak sang mga pagti-

nguha sang rehimeng Arroyo nga tapnaon ang ila mga paghulag, madinalag-on nila ginpakita sa bug-os nga kalibutan nga ang pumuluyong Pilipino indi masinulundon nga karnero nga nagaluhod sa atubang sang pinakagamhanan nga imperyalista kag terorista. Ginpakita nila ang ila nagaawas nga protesta sa nagasingki nga paghimulos kag pagpamigos nga malakolonyal sang imperyalismong US sa Pilipinas kag sa ginakangil-aran nga pagkapapet sang rehimeng Arroyo.

Ginpakita nila ang panindugan nga patriyotiko kag handum nga hilwayon ang Pilipinas halin sa

pagkagugakum sang imperyalismong US kag mga gaway sini sa pungsod.

Ginsikway nila ang dugang nga paghugakum sang imperyalistang US nga nagtuga sang pagkaatrasado kag labing pagpabudlay sa pumuluyong Pilipino kag ang pagpa-singki pa sini paagi sang imperyalistang polisiya nga "globalisasyon sang hilway nga merkado." Gina-salaming nila ang pangkalibutanon nga pagpamatuk sa mga tikang sang US nga labing paalagaron sa interes sini ang World Trade Organization nga nagresulta sa pagpas-law sa ulihi nga pagsugilanon sini sa Cancun, Mexico. Ginsikway nila

***Mga tampok
sa isyu nga ini...***

**Paghimakas agraryo sa
Isabela**

PAHINA 3

**Pagpamatuk
sang pumuluyo
sa SOT sa Cordillera**

PAHINA 7

**Estorya sa likod sang
reyd sa Oras, Samar**

PAHINA 8

ang panibag-ong tuyo sang US nga ipatuman ang mga panugyan sini sa paagi sang mga baylateral kag rehiyunal nga kasugtanan sa katuyuan nga makig-unahan sa iban pa nga imperyalistang pungsod kag dugang pa nga makamonompolisa kag makahugakum sa ekonomya sang iban nga pungsod, labi na sang mga atrasadong pungsod.

Ginasikway sang pumuluyong Pilipino ang nagasingki kag nagadalom nga armadong interbensyon sang US sa Pilipinas. Nagpahayag sila batuk sa mga tikang para ibalik ang mga base militar sang US-malapanan man ukon gagmayan, permanente man ukon indi. Ginasinggit nila ang pagbasura sa Visiting Forces Agreement, sa Mutual Logistics Support Agreement, sa kasugtanan nagalibre sa mga suldadong US halin sa pagsakup sang International Criminal Court kag iban pa nga kasugtanan nga nagahatag-dalan sa interbensyon militar sang US sa Pilipinas.

Ginsikway nila ang doktrina sang "anti-terorismo" sang US nga bulag nga ginasuportahan sang rehimeng Arroyo. Ginapakamalaut nila si Arroyo sa pagpatay kag pagsakripisyo sa altar sang "anti-

terorismo" sang sugilanon pangkalinungan kag paggisi sa pulo ka kasugtanan sa tunga sang gubyrerno kag sang National Democratic Front. Ginapakamalaut nila ang terorista nga gera ni Arroyo, ang malapanan nga militarisasyon, kag ang pag-armas sang US sa iya pinakamasaligan nga papet. Ginpakamalaut nila ang wala huya nga pagpamilit ni Arroyo sang armadong pagpasilabot sang US sa gera sibil sa Pilipinas kag sa gera anti-Moro sa binuang nga pagsigahum nga mahadlok nila ang pumuluyo kag mga rebolusyonaryong pwersa.

GINPATINGKAD SANG PAGBISITA NI Pres. George Bush sang US ang neokolonyal nga kinaiya sang sistemang pangpulitika kag pang-ekonomya sa Pilipinas. Pinalutaw sini ang nagapasingki nga pagpamigos kag pagpanghimulos sang imperyalismong US sa Pilipinas kag sa iban pa nga malakolonyal nga pungsod.

Solo ang mga papet, dalagku nga kumprador, burukrata kapitalista, pasista, mga nagahimulos kag nagapigos sa pumuluyo ang nagsaulog sa pagbisita sang gintangla nila nga amo kag ginhuluhuran nga diyos-ang imperyalistang hepe kag numero uno nga


terorista sa kalibutan.

"Amen!" kag palakpak ang paliwat-liwat nila nga sabat sa pag-sambit sang doktrina "anti-terorismo" sang ila diyos nga Bush. Nangatla sila sa pagpamati sa tiko nga pagrason sa pagpanggera sang US kag paghatag-dungog sa todo suporta diri sang papet nga rehimen ni Arroyo. Nagaugyon sila sa puno nga barumbado sa bugalon nga pagdeklarar sini sang madinalag-on nga pagpatuman sang Pax Americana sa sibilisado nga pagpakigrelasyon pangkalibutan.

Ululupod sila nga nagpakabusog sa pila ka pulo ka milyon nga punsyon kag mga dekorasyon nga dulot nila kay Bush. Sa pagpanguna sang puno nga papet nga si Gloria Arroyo, ginsaulog nila ang isa ka siglo sang kolonyal kag malakolonyal nga pagginahum sang poderosong Amerika kag ang mga labing ulihi nga himbunanay kag padihut nila sa mas malaut kag baraghal pa nga pagpanghimulos kag pagpamigos sa pumuluyo. Samtang nagamantika ang ila mga bibig, abot-langit ang ila mga hosanna sa imperyalista nga "globalisasyon" kag pagdayaw sa "gera batuk sa terorismo."

Ululupod sila nga naga-ingos sa ila amo kag nagapangayo sang limos-pagpadamol sa kahita, gamay nga sinsilyo nga pangpuno sa buslot nga bulsa sang gubyrerno kag pila nga salin nga kagamitan militar para pangtapna sa mga nagaalsa nga pumuluyo. Pareho sang nagtaliwan ginpromisa nila nga ihalad ang tanan-bisan ang gamay nga nabilin nga kahlilwayan sang Pilipinas. Nakahanda sila nga bag-uhon ang konstitusyon mismo sang gubyrerno agud pasanyugon pa ang neokolonyal nga kontrol sang US sa Pilipinas.

MAKANGINGIL-AD ANG ISKANDALOSO nga gingasto para sa engrande nga *Sundan sa "Editorial..."*, pahina 3

| | |
|--|-----------|
|  <p>Tuig XXXIV No. 18 Oktubre 21, 2003</p> <p>Ang Ang Bayan ginabantala sa lengwahe nga Pilipino, Bisaya, Iloko, Hiligaynon, Waray kag Ingles.</p> <p>Mahimo ini i-download halin sa Philippine Revolution Web Central nga makit-an sa:</p> <p>www.philippinerevolution.org.</p> <p>Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.</p> <p>Malab-ot kami paagi sa e-mail sa:</p> <p>angbayan@yahoo.com</p> | |
| Kaundan | |
| Editoryal | 1 |
| Protesta batuk kay Bush | 3 |
| Baylateral na kasugtanan | 4 |
| Koresponsal | |
| Paghimakas agraryo sa Isabela | 5 |
| Napaslawan ang "Orgullo" | |
| Brigade sa Bicol | 6 |
| Pagpamatuk sa SOT sa Cordillera | 7 |
| Estorya sa likod sa reyd sa Oras, Samar | 8 |
| Sugilanon pangkalinungan | 10 |
| 2 libro ni Ka Joema | 10 |
| Ekstorsyon sang rehimen sa Fraport | 11 |
| Balita | 12 |
| <p>Ang Ang Bayan ginabantala duha ka beses kada bulan sang Komite Sentral sang Partido Komunista sang Pilipinas.</p> | |

Nagadabdab nga mga protesta, nagsug-alaw kay Bush


Nagadabdab nga mga bandera sang US ang nagsug-alaw sa walo ka oras nga pagbisita sa Pilipinas ni Pres. George W. Bush sang US. Ginsunog ang mga bandera sang imperyalistang US sa siyam ka mayor nga syudad kag mga sentrong banwa sa bug-os nga pungsod umpisa gab-i sang Oktubre 17 tuhtub Oktubre 18.

Ang pagsunog sang mga bandera sang US kag *effigy* ukon imahen nanday Bush kag Arroyo kulminasyon sang halos adlaw-adlaw nga aksyong protesta sa bilog nga pungsod sining Oktubre. Sa kabilugan, nag-abot sa 50,000 ang nagprotesta sang mag-abot ang numero uno nga terorista.

Ginpamunuan sang Bagong Alyansang Makabayan (BAYAN) ang rali sa Commonwealth Avenue sa Quezon City nga gintambungan sang maabot sa 10,000 nga demonstrador halin sa mga pungsodnon-demokratikong organisasyon sa idalum sini. Kaupod sanday Satur Ocampo kag Crispin Beltran sang Bayan Muna, nagmartsa sila pakadto sa Batasang Pambansa Complex pero gin-abangan sila sang 800 ka pulis nga *anti-riot* duha ka kilometro ang kalayuan sa Batasan. Masobra 11,000 ang pwersa nga nagabantay sa palibot sang Batasan kag Malakanyang.

Samtang ginahulat si Bush, ginpanagtag sang mga demonstrador ang pahayag ni Jose Ma. Sison, *senior political consultant* sang NDF *negotiating panel*. Siling niya: "Nakigkita ang imperyalistang amo sa iya pinakamasinulundon nga papet sa Southeast Asia agud makig-intuanay kag isaulog ang makasuluka nga relasyon." "Para sa pumuluyong Iraqi kag iban pa nga biktima sang imperyalismong US," singgit sang mga demonstrador samtang ginasunog nila ang 100 bandera sang US. Ginlapaklapakan sang mga 300 nga nagaprotesta ang isa ka mas daku nga bandera sang US (7 metros ang lapad kag 14 metros ang haba) nga may nakasulat nga *US imperialist No. 1 terrorist* bag-o nila ini gingisi kag ginsunog.

Sa guwa sang Metro Manila, dululungan nga ginlunsar ang



mga hublag protesta umpisa sa bisperas sang pagbisita ni Bush. Nag-abot sa 7,000 ka demonstrador sa pagpamuno sang BAYAN-Central Luzon ang naglunsar sang martsa-rali halin Oktubre 17 tuhtub 18 sa pwertahan sang Clark Zone, anay base militar sang US, sa Angeles City. Upod nila ang mga delegasyon halin sa mga rehiyon sang Ilocos, Cordillera kag Cagayan Valley. Sa pihak naman sang tuyo sang mga pulis nga abangan ang 2,000 nga katapu sang Southern Tagalog Opposed to the Presence of Bush (STOP Bush!), nakaabot sila sa Maynila. Sa gabi sang Oktubre 17, naghiwat sang konsyerto sang protesta sa University of the Philippines, Diliman, Quezon City. Sadtong Oktubre

Sundan sa "Protesta...", pahina 4

"Editorial...", halin sa pahina 2

pagsug-alaw sang rehimeng Arroyo kay George W. Bush. Wala bisan gamay nga respeto sa pungsodnon nga soberanya kag integridad ang rehimen sang pabayaan sini nga mangbastos ang imperyalismong US sa wala-modo nga pagbasuk-ay sang Malakanyang, Kongreso kag iban pa nga alagyan kag pagapunduhan ni Bush. Lubos nga nakapatakig ang paglatag ni Arroyo sang pula nga alpombra para kay Bush

matapos sini bakbakon ang mga barungbarong sang gatus-gatos nga imol sa syudad kag hanuton sang batuta ang mga nagaprotesta.

Kaladlawan ang rehimeng Arroyo sa paghatag sang lubos nga pagdayaw kay Bush samtang ini ginakundenar sang pumuluyo sa bug-os nga kalibutan kag bisan sang pumuluyong Amerikano bangud sa iya pasista nga pagpanulsol sang gera, imperyalista nga pagpanglubag, pagpaniplang kag

pagbinutig.

Pagabayaran sang mahal ni Arroyo ang ginpakita niya nga wala-kutod nga pagdilap sa imperyalismong US. Kadungan sang pagkangil-ad sang pumuluyo sang kalibutan kag paghusgar sang kasaysayan sa diyus-diyos nga si Bush, amo man pagahusgaran si Arroyo sa Pilipinas sa iya binuang nga pagsunod-sunod sa imperyalistang amo kag sobra nga pagpaantos sa pumuluyong Pilipino.

AB

Baylateral nga kasugtanan, ginaluto nanday Bush kag GMA

Padayon nga ginaduso sang imperyalismong US ang "globalisasyon sang hilway nga merkado" sa nagkalain-lain nga paagi agud maisulong ang pang-ekonomya nga hegemonya sini sa kalibutan. Padayon ini nga nagapanglubag agud iduso ang mga pangkalibutanon nga kasugtanan sa balayon sang General Agreement on Tariffs and Trade/World Trade Organization (GATT/WTO). Kadungnan sini, nagamaniobra ang USA agud ilatag kag palig-unon ang mga baylateral kag rehiyunal nga mga kasugtanan sa tunga sini kag sang nagkalain-lain nga pungsod. Sa paagi sang amo nga mga kasugtanan iga-sal-ot sang US kag mga papet sining rehimen ang dugang nga liberalisasyon sa negosyo kag pagpangapital.

Labing nangin malahalon para sa imperyalismong US ang pagpadasig sa pagbilog sang mga baylateral kag rehiyunal nga kasugtanan kag pagpahugot sa nagaluntad na nga mga kasugtanan sa amo nga lebel sa atubang sang pagkapaslaw sa negosasyon sang WTO sa Cancun, Mexico. Sa pagpakig-areglo sang US sa mga rehiyon kag pungsod, tuyo sini nga pahumukon ang pusisyon sang mga nagapamalabag kag nagpaslaw sa mga rekomendasyon sang US sa Cancun, nagapadayon ini sa pagpanghugakom sa kalibutan.

Lakip ang mga ini sa adyenda ni Bush sa madasi-gan nga paglibot sa Southeast Asia kag pagtambong sa Asia-Pacific Economic Cooperation Summit sa Thailand. Mayor man nga adyenda ni Bush ang pagpangampanya sang padayon kag hugot nga suporta sang mga alyado kag papet sang US sa "gera nga anti-terorista" kag pagsuporta sang mga ini sa nagabudlay nga okupasyon sang US sa Iraq.

Sa Pilipinas, ang baylateral nga kasugtanan nga ginaplano indi maglayo sa Laurel-Langley Agreement sadtong 1954 kag Bell Trade Act sang 1946. Pagahatagan sang baylateral nga kasugtanan nga ini sang kapareho nga kinamatarung ang mga dumuluong, sa

partikular ang mga Amerikano nga monopolyong korporasyon, nga nagapanag-iya sang halos sang mga negosyo kag kadutaan kag magakontrol sa nagkalain-lain nga aspeto sang ekonomya.

Sadto pa nga nagtaliwan nga tuig ginapamilit na sang mga higante nga korporasyong Amerikano ang kumprehensibo nga baylateral nga kasugtanan para sa "hilway nga negosyo" sa tunga sang US kag Pilipinas. Sadtong Abril 2002, ginprimahana ang Business Framework Agreement (BFA) sa tunga sang US-Philippines Business Committee kag US ASEAN Business Council sa isa ka bahin kag, sa pihak nga bahin, sang RP-US Business Council nga aktibo nagaduso oara mabilog ang kumprehensibo nga kasugtanan nga ini. Samtang wala pa ini, ang BFA ang magatindog nga kasugtanan para sa "hilway nga negosyo" nga nagasakup sang masunod:

1. Liberalisasyon sang negosyo kag pangapital
2. Liberalisasyon sang *airlines industry*
3. Deregulasyon sang sektor sang enerhiya
4. Deregulasyon sang mga negosyo nga nakasentro sa *e-commerce* pareho sang *call centers*
5. Pagduso sang *genetically-modified organisms* (GMO) sa sektor sang agrikultura
6. Pagpabaskog sang turismo

Lakip sa US-Philippines Business Council ang pila sa mga higante nga korporasyong Amerikano pareho sang AOL Time Warner, Boeing Company, British Petroleum, Chevron Texaco, Federal Express, Kellogg Brown & Root, Monsanto Company, Motorola, Unisys kag United Technologies Corporation.

Ang mga korporasyon pareho sini ang pangunahon makabenepisyo sa isa ka kasugtanan para sa komersyo kag pangapital sa tunga sang US kag Pilipinas. Ginaduso man sang mga korporasyon nga ini ang mga pagbag-o sa konstitusyon agud dulaon ang mga probisyon nga nagadeklarar sang proteksyon sa pungsodnon nga patrimonya. AB

"Protesta...", halin pahina 3

13 pa nila ginsugdan ang ila caravan sa Calamba City, Laguna.

Masobra 15,000 ang naghulag sa Bicol: 5,000 sa Sorsogon City; 2,000 sa Naga City; 4,500 sa Masbate City; 2,000 sa Legaspi City; kag 400 sa Daet, Camarines Norte. Masobra 2,000 sa Panay: 2,000 sa Ilo-

ilo City; 300 sa Roxas City; kag 300 sa Kalibo, Aklan. Masobra 2,000 man ang nagrali sa Eastern Visayas: 1,500 sa Catbalogan City; kag 550 sa mga syudad sang Tacloban kag Ormoc. Sa Cebu City, 1,000 ang nagprotesta samtang masobra 100 ang nagrali sa Bacolod City.

Sa Mindanao, isa ka rali pang-

kultura ang ginhiwat sa Davao City nga gintambungan sang may 3,000 katawo. Nagtipon man sa General Santos City ang 5,000 demonstrador. Naghalin sila sa South Cotabato, Sultan Kudarat kag Sarangani. May 1,000 man nga nagprotesta sa Cagayan de Oro kag Misamis Oriental. AB



Mga leksyon kag kadalagan sa paghimakas agraryo sa Isabela

Kwarenta'y singko ka lider kag katapu sang Pambansang Katipunan ng mga Magbubukid (PKM) halin sa lima ka banwa sang timog Isabela kag prubinsya sang Quirino ang nagtambong sa Kumperensya sang Mangunguma sining Septyembre 22-24. Ang pulong nga ini nga ginhiwat sa Cagayan Valley ginlunsar agud sumahon ang mga eksperensya kag maghimo sang mga resolusyon para sa pagpasulong sang mga paghimakas sang masang mangunguma sa Isabela.

Lakip sa mga ginsuma sang kumperensya amo ang eksperensya sa Isabela sadtong Mayo, kon sa diin napanubo ang interes sa pautang sang 40-50% kag nadula ang madamo nga porma sang pagdinaya sang komersyante. Masobra 101, 000 ka mangunguma halin sa masobra 100 baryo ang nakabenepisyo sa mga kadalagan nga ini.

Malaparan nga pagpahulag kag pag-organisa sa masa. Gintumod ang mga sangkap sa likod sang mga kadalagan sini. Pangunahon sa mga ini ang pagpasulong sang munisipalidad-kalapad sang pangmasang paghimakas nga nagguba sa konserbatismo sa paglunsar sang mga agraryo nga paghimakas kag nangin yabi sa pagpadasig sang pag-organisa kag pagpahulag sa masa.

Sa sulod sang anum ka bulan nga paghimakas, masobra 1,300 pumuluyo ang nagapasakup sa masobra 100 grupo sang mga mangunguma, kababainhan, pamatan-on, pungsodnon nga minorya, bata kag nahanunga nga pwersa. Nasuguran man sa nabagatnan Isabela ang pagtukod sang sanga sang PKM,

kag madamo pa nga komiteng pang-organisa.

Pila ka gatos nga aktibista ang napatuhaw kag napahulag. Pila ka gatos man nga pumuluyo ang nahatagan sang rebolusyonaryong edukasyon sa tion kag pagkatapos sang kampanya. Masobra 2,300 mangunguma halin sa 45 baryo ang napahulag sa mga kumprontasyon. Amo pa lamang natabo sa lugar ang amo kadaku nga mobilisasyon.

Antipyudal nga makasahing linya. Pangunahon nagsandig ang kampanya sa kusog sang mga basehang saray sang sahing mangunguma sa pagpabwelo, pagpadayon kag pagpadaog. Liwat ginapamatud-an nga sila ang labing masaligan nga sandigan sang kahublagang masa sa kaumhan. Sa basehan nga ini, ginpahulag man ang bug-os nga baryo. Lunsay ang mga yara sa basehang saray kag nahanungang mangunguma (lakip ang mga upisyal sang mga tradisyunal nga organisasyon kag Barangay Council), labi na sa kampanya anti-usura. Napasuporta ukon nanyutralisa ang mga manggaranon nga mangunguma (lakip ang mga *guarantor* kag iban pa nga ekstensyon sang sistema sang komersyanteng usura.)

Signipikante nga numero sang mga nahanunga nga pwersa ang nangutan kag nagbulig sa kahublagang mangunguma. Naangutan kag sumuporta ang mga propesyunal sa mga baryo kag sentrong banwa, mga lokal nga burukrata, tawong simbahan kag empleyado sang guberno kag naghatag sila sang suporta pangpulitika, pinansyal kag



teknikal. Nakabulig man sila sa pagsagang sa pagpanalakay militar sa kahublagang mangunguma, pagpadaog sang mga demanda sa kumprontasyon kag pagpat-ud nga indi talikdan sang mga target sang kampanya ang mga naabot nga kasug-tanan.

Kahandaan sa propaganda kag pagpahulag. Maayo nga napreparahan ang tanan nga kinahanglanon sa padayon nga paglunsar sang ahitasyon kag propaganda kag pagpahulag sa masa. Nag-abot sa malapad nga kubay sang masa ang nagkalain-lain nga porma sang propaganda nga ginapagguwa, tulad sang mga polyeto, istrimer, *flyer*, pahayag sa midya kag paghambal sa istasyon sang radyo. Ginasi-guro ang pagpahulag sang linibo agud ipakita ang kusog sang kahublagang mangunguma. Ginhandang ang mga salakyan, pagkaon, kag ang plano pananglitan pungan sang AFP kag PNP ang aksyong protesta.

Gintukod kag ginpataas ang lebel sang mga rebolusyonaryong organisasyong masa bilang taludtod kag motor sang kampanya, sam-



tang ginabilog man ang mga ligal nga organisasyon bilang tagakoordinar sang malaparan nga kampanya.

Matinugahon nga naabot kag namobilisa ang masa lunsay sa paagi nga hayag kag tago.

Rekrutment sa Partido kag BHB. Labaw sa tanan, ginasiyuro nga ang pagsulong kag pagpadaog sang kampanya nagaserbi sa dugang nga pagpadaku kag pagpabaskog sang Bag-ong Hangaway sang Banwa, Partido kag Pulang gahum pangpulitika.

Katumbas sang regular nga platun ang narekrut sa BHB sa panahon kag pagkatapos sang kampanya. Madamu-damo nga pamatan-on sa baryo ang naengganyo

nga mag-entra sa hangaway base sa nakita nila nga dedikasyon sang BHB sa pag-ubay sa mga paghimakas mangunguma. Signipikante man nga numero sang mga nag-integrasyon halin sa syudad ang nakumbinse nga magpultaym, pangunahon bangud sa nakita nila ang hugot nga relasyon sang BHB kag masa, labi na sa pagpasulong sang rebolusyong agraryo. Signipikante ang pagdaku sang Partido sa lokalidad, amo man ang pagdamo sang mga katapu sang local nga milisya.

Liwat ginpamatud-an nga ang rebolusyong agraryo ang yabi nga angot kag hilo nga nagatahi sa mga hilikuton sa kaumhan. AB


Napaslawan ang "Orgullo" Brigade sa Bicol

"Umpisa nga gintukod ang 9th 'Orgullo' Brigade, lain-ulo ini sa pagrekrut sang madamo nga pamatan-on nga Bikolano agud mangin suldado." Ini ang pahayag ni Gregorio Banares, tagapamaba sang National Democratic Front sa rehiyon sang Bicol. Sang tukuron ang nasambit nga yunit sang Philippine Army sang nagtaliwan nga tuig, nga magtukod sang isa ka dibisyon sang mga suldado nga lunsay Bikolano. Ginagamit sang bag-o nga yunit ang bansag nga "Orgullo" bangud sila kuno ang dungog sang Bicol (sa lengwaheng Bikol, ang pulong nga "orgullo" nagakahulugan nga "dungog"). Ang 9th Brigade ang pangunahon nga yunit militar nga nakatunod sa bilog nga Bikol. Nakabase ini sa Camp Canuto sa Pili, Camarines Sur.

Ginpagamay nga brigada lamang ang naabot nga rekrutment para sa ginaplano nga dibisyon. Bilang pangpuno, nagrekrut ini sang mga elemento sang CAFGU, lakip ang mga menor-de-edad kag mga may kaso kriminal. Sa sini nga paagi, nakakinot ang brigada samtang nalibre sa madamo nga trabaho ang mga regular nga tropa.

Ginarason sang mga upisyal ang kakulangan sa badyet gani indi sila makarekrut sang bastante nga

numero sang tawo para sa "Orgullo" Brigade. Pero labaw pa diri, wala magmadinalg-on ang brigada bangud ginakangil-aran ini sang pumuluyo tuga sang mahaba nga rekord sang mga krimen kag pagpang-abuso sa ila. Sa umpisa pa lang, ginpamatukan na sang pumuluyo ang ginahimo sini nga rekrut-



ment para sa CAFGU kag ang pagtukod sini sang mga detatsment sa nagkalain-lain nga lugar.

Dugang diri, indi lipod sa pumuluyo kag mismo sa mga elemento sang CAFGU nga masami sila naging biktima sang kapalpakang AFP kag PNP klag ila mga upisyal. Pila ka halimbawa:

Sadtong Pebrero 20 subong nga tuig, napatay sang mga pulis sa isa ka *misencounter* sa Barangay Mapi-nya, Masbate City ang isa ka myembro sang CAFGU kag napilasan ang duha sang magresponder ang nasambit nga mga elemento sang CAFGU pagkatapos silutan sang isa ka yunit sang BHB si Barangay Ka-

pitan Laloy Danao nga myembro sang sindikato. Ginpagguwa na lamang sa midya nga ginreyd kuno sang BHB ang Kababayan Center nga nagresulta sa pagkamatay kag pagkapilas sa nasambit nga elemento sang CAFGU.

Sa isa pa ka *misencounter*, napatay sang mga suldado sang 2nd IB ang duha ka elemento sang CAFGU sa Barangay Bangao, Baleno, Masbate pero liwat ginpagguwa sa midya nga napatay ang mga ini sang makaengkwentro ang BHB. Sa kaakig sang kaupdanan nila sa CAFGU, dulungan sila nga nag-AWOL.

Bangud sa mga ini, nagdamo mga tropa nga naghalin na sa CAFGU kag AFP. Ang iban sa ila nagsu-render sa BHB kag ara pa nga nag-entra. Suno sa NDF-Bicol, sadtong ikaduha nga simana sang Septyembre, naghalin sa 31st IB ang 13 katapu sang CAFGU sa Barangay Bagong Silang II sa Labo, Camarines Norte.

"Naghalin sila bangud indi na nila mabatas ang pagpang-abuso sang mga upisyal sang Charlie Company sang 31st IB, kag ang masami na pagkaulihi sang ila gamay nga alawans," suno kay Banares.

(Halaw sa *Bukas nga Sulat sang NDF-Bicol sa mga CAFGU kag ordinario nga suldado sang 9th Brigade, Septyembre 25, 2003.*) AB



Pagpamatuk sang pumuluyo sa SOT sa Cordillera

Ang paglunsar sang mga operasyon "kontra-insureksyon" sang mersenaryong militar sa paagi sang Special Operations Team (SOT) amo ang pilit nga pag-ilog sang AFP sa mga Armadong Yunit Pangpropaganda (AYP) sang Bagong Hangaway sang Banwa. Luwas sa paggamit sang mga madamo nga pwersa para dumugon ang mga pangunahon nga ginakonsentrahang baryo, pagtum-ok sa mga aspeto militar kag pagpada-ku sa papel sang ahensyang sibilyan sa pagpatuman sang pila ka sangkap sang saywar, wala sang ginbago sa esensya ang SOT bisan may bag-o nga pagtawag sini subong nga Reengineered SOT (RSOT).

Nagsulod ang SOT sa eksena matapos ang *clearing operations* (paghawan), kon sa diin may pagtanya natabog na ang BHB sa mga lugar. Nagasunod sila sa paghimo sang *holding* kag *consolidation operations* (pagkapot kag pagpalig-on). Ang mga operasyon sang SOT ang nagabug-os sang ikatlo nga bahin sang mas malapad nga Triad Operations (pagmaniobra ukon pag-atake, paniktik kag SOT). Sa isa ka natalana nga lugar, may nagatimbang sa mga SOT nga Maneuver Operations kag Intelligence Operations.

Masami kabahin sang hilikuton sang SOT ang paniktik kag pagtanom sang mga *asset* sa kubay sang masa kag pulupunahon man ini nagapasakup sa mga operasyon pang-atake. Pero ang pangunahon nga tum-ok sini amo ang Civilian-Military Operations (CMO) nga sa kamatuoran *psychological operations* ukon *psy-ops*. Nagapakuno-kuno ini nga mabuot kag nagahimo sang palsipikado nga bersyon sang hilikuton masa sang BHB sa pagtinguha nga mati-plang ang pumuluyo, makahabig ang ila balatyagon kag pamen-saron kag malikaw sila sa dalan sang rebolusyon.

May duha ka paagi sang paglunsar sang SOT sang *psy-ops*: sa hambal kag sa buhat.

Sa *psy-ops* sa hambal, ginasamaran nila ang rebolusyonaryong hublag. Sa ila mga programa sa radyo, pagmiting kag paghatag sang polyeto, ginalaragway nila nga demonyo ang BHB. Ginapalapta nila nga wala sang nars kag doktor nga nagakadto sa baryo bangud nahadlok ang mga ini sa BHB, nga ang BHB amo ang



dibuho halin sa "Dangadang"

nagatanum sang marijuana, nagahimo sang mga buhat kriminal para makakwar-ta kag iban pa nga kabutigan.

Sa *psy-ops* sa buhat, nagalunsar sila sang mga CMO pareho sang mga *medical mission*, pahampang, palaguwaon kag "pagtuon." Sa kamatuoran, ang ginatawag nila mga "pagtuon" amo ang lektura sang mga upisyal militar, mga nabuyok nila ukon nagapakuno-kuno nga *rebel returnee*. Sa Cordillera, lakip sa ginagamit nila ang taghatag sang lektura ang mga elemento sang CPLA.

Wala sang iban nga unod ang mga ini kundi pagpana-mad sa komunismo kag sa BHB. Ginasunod-sunod nila ang kampanya sa literasi sang BHB. Nagapagguwa sila sang mga sine nga mapanamad sa Partido kag BHB ukon indi gani malaway nga pelikula. May ara man sila nga drama nga kon sa diin ginapagguwa ang sobra nga kalainan sang BHB.


Pakuno-kuno nga nagahimo man sila sang imbestigasyong sosyal pareho sang BHB, pero ini para lamang tumuron ang mga nagasuporta sa rebolusyonaryong hublag. Kon makabilog na sila sang listahan sang mga ginasigahum nila nga simpatisador, ginapagguwa nila sa mga miting sa baryo ang mga ngalan sang "tumod" nila nga mga "NPA supporter" kag ginipresyur ang mga ini ginapahog kag gina-intriga.

Nagahatag man sila sang gamay nga pinansya para sa mga mapaniplang nga proyekto pangpangabuhian bilang suhol. Lakip na diri ang mga proyekto pangkooperatiba nga masami ginapakaptan nila sa mga oportunistang kag sa kinaandan nangin halinan lamang sang mga kagarukan kag inaway. Partikular sa Cordillera, pinakapapel nila diri ang mga kontra-rebolusyonaryong organisasyon pareho sang Kalinga Bodong Council sang mga burukrata kag pulitiko kag Concerned Citizens of Abra for Good Government sang mga repormista nga sosyal demokrata.

Sa mga komunidad nga *binodngan*, nagapanawagan sila sang paghiliusa kag areglo sang mga tribo para indi maglapnag ang gera sang mga tribo. Pero ang ginahambal nila nga areglo kag paghiliusa amo ang pagtukod sang mga *barangay intelligence network* (BIN) kag CAFGU.

Pero sa kadam-an, nabudlay katama ang mga SOT nga makarekrut sa mga baryo, labi na sa mga

Sundan sa "SOT...", pahina 8



Ang estorya sa likod sang reyds sa Oras, Eastern Samar

Sadtong Hunyo 26, nakibot ang kaaway sang ginlunsar sang mga Pulang hangaway ang daw makakulunyag nga pagsalakay sa detatsment sang 52nd IB sa Barangay Cagpili, Oras, Eastern Samar. Napulo ka elemento sang CAFGU kag lima ka suldado ang napatay kag duha ang napilasan. Nakumpiska ang 25 armas: isa ka M203, pito ka M16, lima ka M14, siyam ka Garand, duha ka karbin kag isa ka .45 kal. pistola. Nakaagaw man sang 2,225 bala, mga gamit pangkomunikasyon, mga napsak kag uniporme kag iban pa nga kagamitan militar kag pang-upisina.

Ginapaambit sang masunod nga artikulo ang kamatuoran sa likod sang madinalag-on nga reyds sa Oras, labi na nahanungod sa kalapad kag kadalom sang suportang masa sa armadong paghimakas. Ginatadlong man sini ang ginapalapta sang AFP nga mga binutig nga estorya. Ginkuha ini sa mga koresponsal halin sa Eastern Visayas:

Madulom pa sadtong kaaganghon sang Hunyo 26 sang likum nga nagmaniobra ang mayor nga pwersa pang-atake sang BHB pakadto sa target nga detatsment sang 52nd IB sa Barangay Cagpili, Oras, Eastern Samar. Platoon-kadaku nga mga regular nga

suldado kag mga elemento sang CAFGU ang nadestino sa detatsment. Nakapwesto ini sa ibabaw sang bakolod nga 50 metros ang taas kag nagaatubang sa suba. Bangud pinakamabakod diri ang depensa, wala ginalauman sang pasistang kaaway nga magahalin sa

direksyon sang suba ang anuman nga atake sang BHB. Nakatמוד ang pagbantay kag depensa sa isa pa ka bulod sa likod sang ila pusisyon.

Ginhingalitan sang BHB ang amo sini nga pagpamensar sang kaaway. Sa ginhimo nga plano sa

“SOT...”, halin pahina 7

organisadong baryo. Pila gid lang ang mga baryo nga may BIN kag CAFGU sa Cordillera ka gang mga myembro sini masami pa mga tinawo sang mga mayor ukon indi gani taga-CPLA.

Sa mga lugar nga naabot sang paghulag sang rebolsuyonaryong kahublagan kag pati sang hayag nga demokratikong kahublagang masa, mabaskog ang pagpamatuk sang pumuluyo sa pag-entra sa CAFGU, pagpakighimbon sa militar kag mga makahalalit nga proyekto sang gubyrno kag sang mga dumuluong kag lokal nga nagaharing sahi.

Ang hilikuton pangpulitika sa kubay mismo sang militar nagabunga na sang nagadamo ang nagahalin sa CAFGU kag sikreto nga pag-angtanay kag pagbulig sa BHB sang madamo nga nagapabilin pa nga elemento sang CAFGU.


Indi makuha sang mersenaryo, papet kag pasistang militar ang suporta kag pagsakdag nga ginalauman nila sa masa. Di nila sarang mati-plang ang pumuluyo sa ila pakita-tawo nga pagpahamot. Di gid man makalawig ang ila pagpakuno-kuno bangud sa pila ka tion lamang nagaguwa na ang ila natural nga pagkabarghal, pagkapasista kag pagkalumpen sang mga pwersa sang AFP.

Sa isa ka baryo sa Mt. Province, sa pamiting wala lipud-lipod nga gin-akigan sang upisyal militar ang mga tawo bangud indi gusto sang tagabaryo nga

baligyaan sang manok ang SOT. Ngaa wala man kuno sang may gusto maggiya sa ila sa kagulangan? Amo man sini ang kaso sa madamo pa nga baryo sa Mt. Province kag Abra. Sa Galimuyod, Ilocos Sur naman, indi makatukod sang detatsment ang 50th IB bangud sa mabaskog nga pagpamatuk sang masa diri.

Ang malapad nga pagpamatuk sang pumuluyo bu-nga pangunahon sang mapagsik nga hilikuton pangpulitika sang mga rebolusyonaryo kag demokratikong pwersa sa kubay sang mga mangunguma kag mga pungsodnon nga minorya kag bangud man sa mahaba nga eksperensya sang pumuluyo sa pagpamigos kag sa pagbato nila diri.

Sa madamo nga lugar sang Cordillera, may mahaba nga kasaysayan sang malaparan nga paghimakas sang pumuluyo batuk sa reaksyunaryong estado kag mga pasista, mga mananakop kag mga nagaharing sahi nga gusto magahugakum sang dutang ane-stral kag duna nga manggad kag pasing-kion ang pagpanghimulos kag pungsodnon nga pagpamigos sa mga minorya. Halimbawa sini ang madinalag-on nga pagbato sa Chico Dam, Cellophil kag mga higante nga dumuluong nga kumpanya kag sang mga hayag nga demokratikong organisasyon kag alyansa sang malaparan nga paghiliusa kag wala untat nga pagbato sang mga tribo kag bilog nga pumuluyo sa mga sandigan nga problema sang pumuluyo kag sa partikular nga problema sang pungsodnon nga pagpamigos. AB



atake, ginpusisyon ang pangunahon nga *base of fire* sa pihak nga bakolod bilang daybersyon kag pangpayong sa mayor nga pwersa pangsalakay kag pangaduha nga *base of fire*. Suno sa plano, agawon anay ang mahina nga bahin sang detatsment sa isa ka punta kag himuon ini nga ikaduha nga *base of fire*, agud hulu-halintang makuha ang mga pusisyon sang kaaway sa tunga kag sa pihak nga punta nga may pinakamabakod nga depensa.

Pag-abot sang takda nga oras nga 4:30 sa agahon, ang kalinong gulpe nga ginguba sang dalagko nga mga lupok sang mga masinggan kag pusil sang *base of fire* #1. Halin pa sa malayo, naglakat ang mga Pulang hangaway sa *base of fire* #2 kag pwersa pang-asolt padulong sa ila natalana nga pusisyon.

Daw mga bola sang kalayo ang mga *flare* nga ginapalupad sang mga pasistang suldado agud makit-an ang nagapalapit nga mga Pulang hangaway. Ginkamang sang mga Pulang hangaway ang lunangon kag mataas nga bakolod nga ginahamtangan sang detatsment. Dugang nga kabudlay ang abang nga mabakod nga dobleng kudal nga kahoy nga ginbutangan sang alambre. Gani sang ulihi, gin-alsa na lang ang kudal agud makakamang ang mga kaupod sa idalom, samtang nag-agi ang kadam-an sa hagdan kag pwertahan sang detatsment.

Pagkatapos sang halos wala untat nga lukpanay, naagaw sang mga Pulang hangaway ang target nga isa

ka punta sang pusisyon sang kaaway. Gilayon nga pumusisyon ang *base of fire* #2 agud makonsentrahan sang lupok ang tunga nga pusisyon sang kaaway nga ginaatake na sang pwersang asolt.

Nausisaan sang mga Pulang hangaway nga labing mas maayo ang depensa sang detatsment ikumparar sa impormasyon nga nakuha nila. Mas madamo nga balay-nagaabot sa 19, imbes nga 15-kag may sistema sang mga *running foxhole* nga nagaangot sa mga balay pakadto sa mayor nga erya sang depensa sang kaaway nga nagaatubang sa pihak nga bakolod. Sa amo pa man, isa-isa nga ginbatuan ang kada balay, tuhtub naagaw pati ang tunga nga pusisyon sang kaaway kag naasolt ang nabilin nga mga suldado kag elemento sang CAGFU sa katapusan nga punta sang pusisyon sang detatsment. Nagsurender ang nabilin nga mga suldado nga pilason

kag nakontrol ang detatsment pagkatapos sang mas o menos isa ka oras kag 45 minutos.

Ginbulong sang BHB ang mga napilasan-sanday Mary Jane Canonigo, asawa sang isa sa mga namatay nga suldado, kag isa ka Pfc Nadera.

Sang mahibal-an sang mga Pulang hangaway nga ara sa isa ka *foxhole* kag pilason si Gng. Canonigo, gilayon siya nga ginkuha kag gin-atras sa hilway nga lugar, kon sa diin ginhatagan sang paunang nga tambal ang iya mga pilas. Baliskad ini sa ginapagguwa sang kaaway nga si Gng. Canonigo nakigluthanganay sa mga kaupod tuhtub kamatayon. Ginbilin siya sang mga kaupod sa masa agud masiguro nga madala siya sa ospital. Ang lapsag ni Gng. Canonigo nga upod niya sa *foxhole* gindul-ong sa kaiping nga baryo agud matatap kag mapat-ud nga mabalik sa iya mga himata. Bag-o siya gin-entregar sa masa, ginhingyo ni Gng. Canonigo sa mga medik sang BHB nga nagbulong sa iya nga indi siya pagbayaan-pamatuod sa maayo nga pagtrato sa iya sang mga Pulang hangaway. Sa malaut nga palad, namatay sa ospital si Gng. Canonigo.

Sang bulngon naman si Pfc Nadera, bug-os tagipusun ang pagpasalamat niya sa mga kaupod. Antes mag-atras ang mga gerilya, ginsiguro nila nga napasakay ang mga pilason nga suldado sa *pumpboat* agud gilayon madul-ong sa ospital.

Ginsunog sang mga Pulang hangaway ang desundan sa "*Oras*", pahina 10

Sugilanon pangkalinungan sang NDF kag GRP, liwat buksan

Pagkatapos ang masobra duha ka tuig nga suspensyon sang rehimeng Arroyo, pagabuksan liwat sa masunod nga bulan ang pormal nga sugalinon pangkalinungan sa tunga sang National Democratic Front (NDF) kag sang Government of the Republic of the Philippines (GRP). Ini ang nakasugtan sang magtimbang nga panel sang negosasyon sa impormal nga pulong nga ginhiwat sa Oslo, Norway sadtong Oktubre 9 kag 10, suno sa NDF *negotiating panel*.

Igabase ang sugilanon pangkalinungan sa The Hague Joint Declaration kag siyam nga iban pa nga baylateral nga kasugtan, sa Utrecht Joint Statement sadtong Marso 9, 2003 kag sa Oslo Communique sadtong Abril 30, 2001.

Ginsambit sang NDF nga sablag sa sugilanon pangkalinungan ang padayon nga paglista sang US kag European Union sa PKP, BHB kag kay Jose Ma. Sison bilang mga terorista. Suno sa NDF, pagpasilabot ini sa pangsulod nga halambalanon sang pungsod kag dapat kundenahon sang GRP. AB

Duha ka bag-ong libro ni Ka Joema, ginlunsar

Ginlunsar sang publikasyon nga Aklat ng Bayan sadtong Oktubre 10 ang duha ka bag-ong libro sang nakadistyero nga rebolusyonaryong lider, Jose Ma. Sison, ang *US Terrorism in the Philippines* kag *Pulitika at Ekonomya ng Pilipinas* sa Balay Kalinaw sa University of the Philippines sa Quezon City.



Ang *US Terrorism in the Philippines* mga tinipon nga matalom kag madaluman nga komentaryo ni Sison bahin sa mapanghugakum, mapiguson kag terorista nga operasyon sang imperyalismong US sa Pilipinas kag sa kalibutan kag sa pagbato diri sang mga rebolusyonaryong pwersa kag pumuluyo. Ginapakamalaut man diri ang mga di matarung kag malisyoso nga pagpanamad sang mga imperyalista, pangunahon na sang US, kag sang papet nga rehimen, kag pagbansag sa inya kag sa PKP at BHB bilang "terorista."

Salhin naman sang bersyon ngsa Ingles ang *Pulitika at Ekonomya sa Pilipinas* nga una ginpagguwa sadtong 1998. Ginaunod sini ang serye sang mga interbyu sa iya sang asawa iya nga si Juliet de Lima-Sison sadtong nakahunong si Ka Joema. AB

"Oras", halin pahina 9

tatsment antes sila magsakay sa tatlo ka *pumpboat* sa pag-atras. Wala na sila nasundan sang kaaway.

Desaysibo nga papel sang masa. Sa kadam-an nga proseso sang pagtigayon sang BHB sang taktikal nga opensiba, makahuluga ang papel sang masang mangunguma kag yunit milisya. Nagmobilisa ang mga katapu sang mga organisasyong masa sa Northern kag Eastern Samar kag nag-abot sa 97 katapu sang yunit milisya ang nagpasakup kag sumuporta sa taktikal nga opensiba sa nagkalain-lain nga paagi.

Ang mga myembro sang mga organisasyong masa ang nagsiguro nga maayo ang dalagan sang pagkaon, kagamitan kag iban pa nga suplay para sa daku nga numero sang mga Pulang hangaway halin

sa nagkalain-lain nga yunit gerilya para sa taktikal nga opensiba. Pila ka adlaw anay sila sa ila pwesto samtang ginahulat ang natalana nga adlaw sang reyd, pero wala gid magsungaw ang ila presensya. Ang masang mangunguma ang nagserbi nga mga mata kag dalunggan sang BHB, samtang nagapabilin nga bulag kag bungol ang pasistang militar sa paghulag sang mga Pulang hangaway.

Direkta man nga nagpartisipar ang mga katapu sang mga yunit milisya sa taktikal nga opensiba halin sa pagpreparar, aktwal nga paglunsar sini kag pag-atras. Sila ang nagdul-ong sang pagkaon sa mga kaupod tubtub sa atrasan, nagdala sang mga pagpalupok kag iba pa nga ordnans, kag nagtatap kag nagdala sang mga pilason nga kaupod pagkatapos sang inaway.

Isa sa ila ang nagbulig sa mga Pulang hangaway sa paggamit sang masinggan, samtang 10 ang sumuporta sa tim sang mga medik. Ang iban naman ang nagpanas sang mga agi nga ginbiling sang mga Pulang hangaway sa dalan.

Samtang ginatupok sang kalayo ang nagguba nga kampo sang kaaway, hilway nga ginsunod sang mga Pulang hangaway ang suba. Nag-agi ang mga *pumpboat* sa pila ka baryo, kon sa diin nagtipon sa pangpang sang suba ang masang mangunguma agud tamyawon ang mga Pulang hangaway kag isaulog ang madinalg-on nga taktikal nga opensiba. Pagkatapos sang paglanog sang mga bala, naglanog man sa mahaba nga suba ang paghinugyaw sang mga mangunguma: "Mabuhay ang BHB! Mabuhay ang madinalag-on nga opensiba!" AB

Tuyo nga ekstorsyon sang Malakanyang, ginbuyagyag sang Fraport

Mabaskog nga bunal sa rehimeng Arroyo ang pinakaulihi nga pagbuyagyag sang ekstorsyon sang mga tinawo sang rehimeng Arroyo sa Fraport AG, ang kumpanya nga German nga pangunahon kasosyo sa pagtukod sang Terminal 3 sa Ninoy Aquino International Airport (NAIA). Pormal nga nagpasaka ang Fraport sang reklamo bahin sini sa International Center for the Settlement of Investments Disputes (ICSID), isa ka ahensya sa idalom sang World Bank.

Ginreklamo sang Fraport nga mangayo sang nagaabot sa \$70 milyon ang personal nga abugado ni Arroyo-si Atty. F. Arthur Villaraza-kag si Jose Miquel "Mike" Arroyo, bana sang presidente, agud pahalinson sa proyekto ang pamilya Cheng, ang *dummy* nga ginapagguwa tag-ya sang mayorya sang mga sapi sa PIATCo. Magkasosyo ang Fraport kag PIATCo sa pagtukod sang NAIA Terminal 3.

Dugang pa, "mabaskog nga ginpanugyan" ni Gloria Tan-Climaco, sadto *presidential adviser for strategic projects*, nga kuhaon sang Fraport AG ang ser-

bisyo sang Villaraza-Angangco Law Offices bangud mabaskog ang kunksyon sini sa Malakanyang. Ang nasambit nga upisina yara sa LTA Building, nga ginapanag-iyahan sang pamilya ni Mike Arroyo.

Suno sa Fraport, ginapangayo sang gubyrno nga pahalinson sang Fraport ang pamilya Cheng para hatagan-dalan ang pagsulod sa proyekto sang grupo ni Lucio Tan, kroni sang Malakanyang. Lakip sa mga direkta nga nagpresyur sa Fraport si Atty. Avelino Cruz, Chief Presidential Legal Counsel. Sang indi magpasugot ang Fraport sa kagustuhan sang Malakanyang, ginbale-wala sang Korte Suprema sadtong Mayo ang kontrata sang Fraport kag PIATCo sa pagtukod sang PIATCo.


Ang pagbuyagyag sang kaundan sang sulat sa ICSID sadtong Setyembre 17 nanday Wilhelm Bender kag Manfred Schulch, *chairman* kag *vice chairman* sang Fraport AG. Ginapangayo sang Fraport sa ICSID nga magpatunga ini sa pagpakignegosasyon sa gubyrnong Arroyo nga bayaran sini sang \$425 milyon nga danyos sa arbitraryo nga pagbalewala sa kontrata kag sa mga nagasto na sang Fraport sa pagtukod sang erport.

Sadtong Enero pa nagtampok ang mga kagarukan sa NAIA 3 sang pasakaan sang kaso sa Presidential

Anti-Graft Commission (PAGC) ang pito ka suod nga tinawo sang presidente kaangot sa maanomalya nga paghatag sa PIATCo sang kontrata para sa NAIA3. Lakip sa ginpasakaan sang kaso nga kagarukan amo si Edgardo Manda, *general manager* sang Manila International Airport Authority (MIAA) kag anay *deputy chief of staff* ni Arroyo sang siya bise presidente pa. Liwat tumampok ang kaso sining ulihi sang magpasaka na ang Fraport sang kaso sa ICSID.

Pinakaulihi lamang nga kaso sang kagarukan kaangot sang Fraport sa tampok nga mga iskandalo sa korapsyon nga ginabalahigan sang mag-asawang Arroyo. Sadtong Oktubre 13, ginprisinta ni Sen. Panfilo Lacson ang ikatlo nga bahin sang iya pagbuyagyag bahin sa pagpangurakot sang mga Arroyo. Kabahin sa 23 nga ebidensya sang korapsyon batuk sa mga Arroyo ang paggamit sa pondo sang Philippine Charity Seepstakes Office kag Government Service Insurance System para sa kampanya pangpulitika sang presidente.

Sa tion man nga ini, ika-11 ang Pilipinas sa mga pungsod nga pinakakorap sa listahan sang Transparency International, isa ka organisasyon nga nagalista kada tuig sang mga pungsod sa bilog nga kalibutan suno sa lala sang korapsyon. Halin ini sa pang-12 nga lugar sadtong nagtaliwan nga tuig. Sa Southeast Asia, pang-apat ang Pilipinas sa pinakakorap nga pungsod-masunod sa Bangladesh nga numero uno sa bilog nga pungsod, Indonesia kag Vietnam.





Oktubre 18, Agusan del Sur: Ginsalakay sang Bag-ong Hangaway sang Banwa (BHB) ang isa ka detatsment sang 4th ID sa Barangay Berseba, Bayugan. Isa ka suldado kag isa ka katapu sang CAFGU ang namatay. Ginkumpiska sang BHB ang ila mga armas.

Oktubre 15, Albay: Isa ka elemento sang CAFGU ang napatay kag napilasan ang duha ka sarhento kag isa pa ka CAFGU sang mag-engkwentro ang mga nagapatrulya nga tropa sang 201st Bde kag BHB sa Barangay Danao, Polangui.

Oktubre 14, Isabela: Isa ka sarhento sang 21st IB ang namatay kag isa ang napilasan sang ambuson sila sang BHB sa Barangay Mabayad sa lindero sang mga banwa sang Jones, San Agustin kag Echague.

Oktubre 13, Camarines Norte: Ginreyd sang Bag-ong Hangaway sang Banwa (BHB) ang munisipyo sang San Lorenzo Ruiz. Mga alas 9:45 sang gab-i sang magsalakay ang mga Pulang hangaway. Duha ka pulis ang napilasan sa inaway. Nasunog man ang dyip sang PNP sang palukpan ini sang *grenade launcher*.

Oktubre 10, Occidental Mindoro: Duha ka tropa sang 408th PNP Provincial Mobile Group ang napatay kag duha pa ang napilasan sang palukpan sang bomba ang ila ginasakyan nga dyip sa Sityo Kadilawan, Barangay San Vicente, Abra de Ilog.

Oktubre 4, Laguna. Apat ka tropa sang 1st IB sang Philippine Army ang napatay sang maengkwentro ang isa ka iskwad sang BHB sa Sapang Bomba sa lindero sang Cavinti, Laguna kag Mauban, Quezon sang makit-an sila sang mga Pulang hangaway. Gilayon nga ginpalukpan sila sang BHB.

Apat ang napatay kag madamu pa nga suldado ang napilasan. Gintago sang reaksyunaryong militar ang engkwentro nga ini, kag tigaylo, ginpabugal ni Col. Daniel Lucero, tagapamaba sang AFP, nga nakaagaw sila sang isa ka kampo sang BHB sa Barangay Calminae, Cavinti, Laguna. Pero nasaksihan mismo sang mga tawo nga nagaestar sa palibot sang lawa sang Caliraya, nga malapit sa lugar nga natabuan, sang dalhon sang isa ka helikopter ang mga patay kag pilason nga suldado sa hedkwarters sang 1st IB sa Nakatundan Talaungan, Cavinti.

Mga hukom, naglunsar sang aksyon protesta

TEMPORARYO nga nauntat ang serbisyo sang mga korte sa Maynila kag sa iban pa nga syudad kag banwa sang pungsod sadtong Oktubre 6 sang maglunsar sang mga aksyong protesta ang mga hukom. Ginapamilit sang mga mahistrado kag empleyado sang korte ang pagpasar sa napundo nga Senate Bill 2018 nga nagaunod sang 25% nga pagpataas sa ila sweldo kag alawans. Sa Cebu City, ginsuspender sang mga huwes ang pagbista sa mga kaso sa nasambit nga adlaw. Nagpahayag naman sang supor-ta sa ila ang Integrated Bar of the Philippines-Cebu City kag prubinsyal tsapter sini. Sa Negros Occidental, nagsa-ra ang mga korte sa pito ka syudad kag sa napulo nga iba pang banwa.

GSIS, gintay-og sang mga protesta

GINATAY-OG sang malaparan nga protesta sadtong Oktubre 6 kag 8 ang Government Service Insurance System (GSIS) bangud sa dalagkuan nga kaso sang kagarukan sa pamunuan sini. Sa pagpamuno sang Confederation for Unity, Recognition and Advancement of Government Employees (COURAGE), naglunsar sang martsa-protesta ang mga empleyado sadtong Oktubre 8 sa Maynila. Nag-abot sa 5,000 ang nagtipon sa atubang sang puno nga upisina sang GSIS sa Pasay City agud ipamilit ang pagpahalin kay Winston Garcia, presidente kag *general manager* sang GSIS.

Sa Baguio City kag San Fernando City, La Union, ginpamunuan sang COURAGE ang mga aksyong protesta kag amo man sa Lucena City. Mga 400 empleyado sang 26 nga nagkalain-lain nga ahensya sang gubyerno sa Tacloban City ang naglunsar sang protesta nga ginapamunuan sang COURAGE-Eastern Visayas. Naghimo sang *caravan* sa Bacolod City ang 500 katapu sang COURAGE. Nagmartsa ang local nga alyansa sang mga empleyado sang gubyr-no nga Protect our Funds kag COURAGE sa rehiyunal nga upisina sang GSIS sa Iloilo City antes maghimo sang *noise barrage*.

Rehimeng Sanchez-de Lozada sang Bolivia, ginpukan sang pumuluyo

Sa pihak sang pagsuporta sang gubyrnong US, dala-yon nga napukan ang rehimen ni Pres. Gonzalo Sanchez-de Lozada sang Bolivia sadtong Oktubre 17 pagkatapos sang isa ka bulan nga madinuguon nga pag-alsa sang pumuluyo sa pagpamuno sang Bolivian Workers Central. Nagbulos sa iya si Bise Pres. Carlos Mesa. Nagbilin ang rehimen sang 86 nga patay kag masobra isa ka gatos nga pilason nga pumuluyo. Naghinugyaw sa karsada ang mga minero, estudyante, titser, mangunguma, tumanduk nga Indian kag relihiyoso nga Katoliko sang mabalitaan ang pagbiya sang ginakaugtan nga pinuno. Ang isa ka bulan nga pag-alsa bunga sang masingki nga pabug-at sa pumuluyo sang imperyalistang "globalisasyon sang hilway merkado" kag nagalala nga kaimulon

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIV No. 18
Oktubre 21, 2003
www.philippinerevolution.org

Editoryal

Hepe nga imperyalista kag terorista, ginsikway sang pumuluyong Pilipino

Ang madamol kag mai-tom nga panganod nga dala sang pag-hugpa sa Pilipinas ni Pres. George W. Bush sang US sadtong Oktubre 18 gin-hawan sang pagwagayway sang linibu-libo nga bande-ra nga nagapahayag sang nagaindakal nga protesta sang pumuluyong Pilipino batuk sa imperyalismong US kag papet nga rehimeng Arroyo.



Ang pagsilab sa ginatus-gatos nga bandera sang US-simbolo sang imperyalista nga pagpamigos kag pagpanghimulos sa Pilipinas kag sa bug-os nga kalibutan-nagtuga sang kasanag samtang ang higante nga anino sang imperyalistang agila nagapangibabaw sa bug-os nga pungsod.

Nagdaguob ang mga singgit sang pila ka pulo ka libo nga nagmartsa sa karsada kag sang minilyun-milyon pa nga nagapamatuk sa nagkalain-lain nga paagi kag lugar: Tapuson ang imperyalista nga pagginahum sa Pilipinas! Tapuson ang papet nga rehimeng Arroyo! Sa pihak sang mga pagti-

nguha sang rehimeng Arroyo nga tapnaon ang ila mga paghulag, madinalag-on nila ginpakita sa bug-os nga kalibutan nga ang pumuluyong Pilipino indi masinulundon nga karnero nga nagaluhod sa atubang sang pinakagamhanan nga imperyalista kag terorista. Ginpakita nila ang ila nagaawas nga protesta sa nagasingki nga paghimulos kag pagpamigos nga malakolonyal sang imperyalismong US sa Pilipinas kag sa ginakangil-aran nga pagkapapet sang rehimeng Arroyo.

Ginpakita nila ang panindugan nga patriyotiko kag handum nga hilwayon ang Pilipinas halin sa

pagkagugakum sang imperyalismong US kag mga gaway sini sa pungsod.

Ginsikway nila ang dugang nga paghugakum sang imperyalistang US nga nagtuga sang pagkaatrasado kag labing pagpabudlay sa pumuluyong Pilipino kag ang pagpa-singki pa sini paagi sang imperyalistang polisiya nga "globalisasyon sang hilway nga merkado." Gina-salaming nila ang pangkalibutanon nga pagpamatuk sa mga tikang sang US nga labing paalagaron sa interes sini ang World Trade Organization nga nagresulta sa pagpas-law sa ulhi nga pagsugilanon sini sa Cancun, Mexico. Ginsikway nila

***Mga tampok
sa isyu nga ini...***

**Paghimakas agraryo sa
Isabela**

PAHINA 3

**Pagpamatuk
sang pumuluyo
sa SOT sa Cordillera**

PAHINA 7

**Estorya sa likod sang
reyd sa Oras, Samar**

PAHINA 8